

Pengusaha buah naga raih RM10,000 sebulan

B-H 20/06/09 M/s 11

Tekno Tani



Oleh Mohd Amin Jalil

KONSEP pertanian sebagai perniagaan yang diuar-uarkan kerajaan nyata berjaya mendorong lebih ramai individu membabitkan diri dalam bidang itu dan menjadikannya cabang kerjaya dalam membina masa depan gemilang.

Stigma pertanian sebagai ketinggalan dan tiada potensi masa depan kian terhakis kerana ramai yang mengusahakan sektor itu kini berjaya muncul sebagai usahawan tani, hasil usaha tidak mengenal putus asa serta sokongan kerajaan.

Ada yang sudah meraih pendapatan puluhan ribu ringgit sebulan melalui aktiviti dalam bidang pertanian yang dijalankan secara komersial dan bersaiz besar, termasuk pemuda berasal dari Kluang, Johor, Abdul Rahim Basri, 29, melalui projek tanaman buah naga di Kampung Pulau, Labu, dekat Seremban.

Melalui syarikatnya, Bumi Agriculture, Abdul Rahim membangunkan tanah terbiar seluas kira-kira 1.5 hektar pada 2006 untuk memperluaskan lagi aktiviti perniagaannya selepas melihat potensi buah itu yang mendapat sambutan amat menggalakkan di pasaran.



USAHAWAN GIGIH: Abdul Rahim memeriksa buah naga di ladangnya di Kampung Pulau, Labu, Negeri Sembilan.

Lulusan bidang mekanikal dari Universiti Teknologi Mara (UiTM) Shah Alam ini, berkata pertanian adalah aktiviti keusahawanan yang menguntungkan jika ia dilakukan secara komersial dan penuh komited.

Katanya, kawasan tapak projek itu di-sewa daripada penduduk setempat dengan kadar RM300 setahun bagi setiap 0.4 hektar dan memulakan projek dengan modal keseluruhan RM90,000, termasuk RM20,000 pinjaman dari Agrobank.

“Minat mula berputik untuk melaksanakan projek ini selepas menyedari ia amat berpotensi besar di pasaran dan mendapat permintaan tinggi. Malah, harganya juga memberangsangkan berbanding sesetengah buah-buahan tempatan lain.

“Walaupun memerlukan modal besar, kelebihan tanaman ini dan jangka hayatnya sehingga 50 tahun nyata menguntungkan untuk jangka masa panjang,” katanya, yang turut membabitkan diri dalam perniagaan teknologi maklumat (IT).

Abdul Rahim berkata, kaedah penggunaan bahan efektif mikro yang dihasilkan daripada kajian universiti tempatan selain baja asli organik bagi tujuan tumbesaran dan kawalan serangan serangga membo-

lehkan hasil pengeluaran tanamannya mencapai kadar memuaskan.

“Kaedah kawalan secara biologi berbanding penggunaan bahan kimia memberi kesan baik kepada kawalan serangga perosak, sekali gus buah naga yang dihasilkan bermutu tinggi dan selamat untuk dimakan,” katanya, yang mampu meraih pendapatan sekitar RM10,000 sebulan hasil projek itu.

Walaupun tidak mempunyai pendidikan asas dalam bidang pertanian kecuali pernah mengikuti kursus sehari di Institut Pertanian Malaysia di Ayer Hitam Johor, beliau tidak menjadikannya penghalang untuk mengusahakan projek terbabit sebaik mungkin.

Katanya, pengalaman yang diperoleh melalui perkongsian pintar dengan usahawan lain banyak membantunya menguruskan projek itu dengan berjaya.

“Buah naga melalui projek ini pernah mendapat pengiktirafan sebagai Buah Naga Terbaik pada sambutan Hari Peladang, Penternak dan Nelayan peringkat Negeri Sembilan 2007. Kebanyakan hasil ladang ini dipasarkan di pasar borong Selayang dan beberapa pasar tani di Shah Alam dengan

harga antara RM6 hingga RM8 sekilogram.

“Sambutan setakat ini amat memberangsangkan, malah kadang-kala tidak mencukupi untuk menampung permintaan. Saya bercadang untuk membuka satu lagi kawasan tanaman buah naga di Batu 10 Labu dengan keluasan kira-kira empat hektar,” katanya.

Katanya, projek ladang terbaru itu dijangka dapat dimulakan dalam tempoh ter-

dekat kerana infrastrukturnya sudah disediakan, malah beliau juga sudah memohon pinjaman RM100,000 dengan Agrobank.

Bapa kepada seorang anak berusia dua setengah tahun yang kini dibantu tiga pekerja menguruskan ladangnya, berkata syarikatnya turut mengeluarkan jus dan jem buah naga. Namun setakat ini pengeluarannya terhad antara 200 hingga 300 botol sebulan.

FAKTA

Projek tanaman buah naga

- Keluasan: 1.5 hektar
- Modal: RM90,000
- Jualan: RM6 hingga RM8 sekilogram
- Hasil: RM10,000 sebulan
- Jangka hayat: Sehingga 50 tahun

